



Claude WISELER
President vun der
Chamber vun den Deputéierten
19, um Krautmaat
L-1728 Lëtzebuerg

Lëtzebuerg, den 29/07/2026

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministère fir den Interieur, Bildung, Kanner a Jugend & Famill, Solidaritéit an Integratioun weiderzeleeden.

De 16. Juli 2026 ass d'asbl Arcus – Kanner, Jugend a Famill Affer vun engem Cyberattack ginn. An engem Communiqué vum 24. Juli 2026 huet d'Organisatioun confirméiert, datt en onbefugten Drëtten Zougrëff op Donnéeën op hire Systemer hat, an datt et no den aktuellen techneschen Analyse warscheinlech ass, datt en Deel vun dësen Donnéeën exfiltréiert gouf. D'Aarbechten, fir feststellen, wéi eng Fichieren a wéi eng Persounen betraff sinn, lafe weider.

Arcus ass ee vun de gréisste konventionéierten Träger am sozialen an educative Beräich a betreit ënner anerem Crèchen, Foyeren, Internater a Berodungsdéngschter. Et geet domat potenziell ëm héichsensibel Donnéeën vu Kanner, Jugendlechen a Familljen: psychosozial Informatiounen, Identitéits- a Finanzdonnéeën, an eventuell och Donnéeën, déi ënnert den Artikel 9 vum RGPD falen. Bei Kanner, déi am Kader vun enger Kannerschutzmoossnam placéiert sinn, kann d'Bekanntginn vun Adressen oder Plazéierungsinformatiounen doriwwer eraus eng konkret Gefor fir hir kierperlech Sécherheet duerstellen.

Iwwert dëse konkrete Fall eraus stellt sech d'Fro, wéi eng Ufuerderungen de Staat de konventionéierten Träger am Beräich vun der Cybersécherheet iwwerhaapt stellt, wann hien hinnen d'Betreiung vun deene vulnerabelste vum Land uvertraut.

An deem Zesummenhang wéilt ech de Ministeren dës Froe stellen:

1. Wéini a wéi sinn déi zoustänneg Ministèren iwwer den Incident informéiert ginn?
2. Ass d'Nationale Kommissioun fir den Dateschutz (CNPd) am Delai vun 72 Stonnen notifiéiert ginn?



3. Sinn den HCPN respektiv GOVCERT.LU agebonne ginn? Huet den Träger staatlech Ënnerstëtzung ugefrot – a wa jo, wéi eng gouf geleeest?
4. Ass eng Plainte bei de Sécherheetsautoritéite gemaach ginn?
5. Verfüügt d'Regierung iwwer Informatiounen zur Zuel vun de betraffene Persounen a zu de Kategorie vun Donnéeën, notamment souguer Donnéeën am Sënn vum Artikel 9 RGPD? Wéi vill Mineure sinn dorënner?
6. Sinn déi betraffene Persounen individuell informéiert ginn (Art. 34 RGPD)? Wéi ginn ehemoleg Usagere respektiv hir legal Vertrieeder erreecht?
7. Ass gepréift ginn, ob Donnéeën iwwer Plazéierungen (Adressen, Moosnamen am Kader vum Kannerschutz) betrafft sinn – a wa jo, wéi eng Schutzmoosname ginn en faveur vun deene Kanner geholl?
8. Wéi eng konkret Ënnerstëtzung (Hotline, juristesche Begleedung, Suivi bei Identitéitsmëssbrauch) kréien déi betraffene Familljen, a wien iwwerhëlt d'Käschten dofir?
9. Wéi eng Cybersecherheets Measure hat Arcus am Asaz fir den den Impakt vun der Fuite vun Donnéeën ze minimiséieren (Verschlësslung vu sensibelen Daten, Need to Know, Least Privilege....)?
10. Wéi eng konkret Cybersécherheetsufuerderunge gesinn d'Konventiounen tëscht dem Staat an den Träger vir, iwwert en allgemenge Passus zum RGPD eraus?
11. Ginn et Mindeststandarden (z. B. ISO 27001 oder equivalent), obligatoresch extern Auditen oder Sécherheetstester? Wa nee, firwat net?
12. Faleen Träger vun der Gréisst vun Arcus ënnert den Uwendungsberäich vum NIS2-Kader? Wa nee, gedenkt d'Regierung de Perimeter unzepassen?
13. Musse d'Träger nowiesen, datt déi zur Verfügung gestallte staatlech Mëttel och effektiv an d'IT-Sécherheet an RGPD Konformitéit investéiert ginn? Gëtt dat kontrolléiert – a vu wem?
14. Wéi eng legislativ oder reglementaresch Initiative sinn zanter der Caritas-Affär geholl ginn, fir d'Gouvernancefunktione (intern Kontroll, Risikomanagement, Auditfunktione) bei de konventionéierten Träger ze professionaliséieren?
15. Wéi vill Cyberincidenter goufen an de leschte fënnef Joer vun Träger am sozialen an educative Beräich un d'Ministèren oder un d'CNPD gemellt?



16. Gedenkt d'Regierung e mutualiséierten IT- a Sécherheetsdéngscht fir de Secteur opzebauen (z. B. e gemeinsamen SOC, Ënnerstëtzung duerch de CTIE, oder Kaderkontrakter fir Audite), fir datt kleng a mëttel Träger net eleng dostinn?
17. Ass virgesinn, d'Dauer vun der Konservatioun vun de Donnéeën am Secteur ze reglementéieren, fir d'Volume vun histoireschen Donnéeën ze reduzéieren?

Mat déiwem Respekt,



CLEMENT Sven
Deputéierten

